



Anwar meraikan Duda pada majlis makan tengah hari rasmi di Putrajaya, semalam. Hadir sama isteri Perdana Menteri, Datuk Seri Dr Wan Azizah Wan Ismail dan isteri Duda, Agata Kornhauser-Duda.

(Foto BERNAMA)

Malaysia hargai keikhlasan Poland bantu rakyat Gaza

BERITA HARIAN

11 JUN 2025

m/s: 3

Putrajaya: Malaysia menyampaikan penghargaan ikhlas kepada Poland kerana menghulurkan bantuan kemanusiaan kepada penduduk Gaza, khususnya melalui sokongannya kepada agensi Pertubuhan Bangsa-Bangsa Bersatu bagi Pelarian Palestin (UNRWA) dan penyaluran bantuan kecemasan.

Perdana Menteri, Datuk Seri Anwar Ibrahim, berkata komitmen Poland terhadap usaha kemanusiaan, termasuk penyaluran bekalan penting ke kawasan itu mencerminkan pendirian berprinsipnya terhadap krisis berterusan di Gaza dan wilayah Palestin yang diduduki.

“Saya bagi pihak Malaysia merakamkan penghargaan dan terima kasih atas sokongan terhadap UNRWA dan pendirian anda terhadap penyelesaian dua negara,” kata Anwar pada sidang media bersama Presiden Poland, Andrzej Duda yang sedang dalam lawatan rasmi tiga hari ke Malaysia, semalam.

Perdana Menteri menekankan keperluan mendesak untuk akses kemanusiaan yang ber-

terusan serta penyelesaian aman terhadap konflik yang berlarutan dan menyifatkan situasi di Gaza sebagai tanggungjawab moral global.

“Terdapat keperluan mendesak untuk menjamin keamanan dan memastikan bantuan kemanusiaan terus sampai ke Gaza dan wilayah yang diduduki,” kata Anwar.

Baru-baru ini media antarabangsa melaporkan Kedutaan Poland di Amman menyelaras penghantaran bantuan kemanusiaan dari Poland kepada rakyat Palestin di Semenanjung Gaza yang merangkumi lebih enam tan ubat, susu tepung, barangan keperluan untuk kanak-kanak, bekalan kebersihan dan selimut, yang tiba di Jordan pada 23 April dengan pesawat tentera Poland.

Selain isu Gaza, kedua-dua pemimpin turut membincangkan perkembangan global dan serantau yang lebih luas, termasuk pengalaman Malaysia dalam ASEAN, hubungan dengan China dan pembabitan negara dengan Majlis Kerjasama Teluk (GCC).